



Groupe parlementaire

Här Claude Wiseler  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, den 31. Mee 2024

Här President,

esou wéi d'Chambersreglement et virgesäit, bieden ech Iech, dës parlamentaresch Fro un den Här Policeminister weiderzeleeden.

Lëtzebuerg läit an de leschte verfügbaren Statistiken vun EUROSTAT am Top fënnef vun de geféierlechste Länner an Europa wat d'Unzuel vun Abréich an Iwwerfäll pro 100.000 Awunner ugeet. Der Kriminalitéitsstatistik vum leschte Joer no gouf et 2023 3.973 Abréich oder versichten Abréich, 566 Iwwerfäll mat Gewalt an 3.755 Fäll vu virsätzlecher Kierpverletzung.

Dëst entsprécht ronn:

- 11 Abréich oder versichten Abréich a Gebaier, pro Dag
- 10 Gewaltakte wou Persounen ugegraff ginn, pro Dag
- 11 gewalttätegen Iwwerfäll pro Woch

Allerdéngs héiert een an der Aktualitéit vu quasi kenge Gewaltakten oder Iwwerfäll. D'Journaliste soen, datt si net méi vun der Police gewuer ginn.

An deem Zesammenhang géif ech dem Här Policeminister gär dës Froe stellen:

- 1) Kann den Här Minister matdeelen, wéi vill Iwwerfäll mat Gewalt a vu virsätzlecher Kierpverletzung zanter dem 1. Januar um Zitt vu police.lu an den Aktualitéite publizéiert goufen, a wéi vill der am selwechten Zäitraum un d'Medien kommunizéiert goufen, a jeeweils wéi vill net?
- 2) Kann den Här Minister erklären, firwat déi allermeeschte Fäll net public gemaach ginn (um secret d'instruction kann et jo net leien, well eng Meldung wéi "an der Stad gouf eng Persoun iwwerfall a verletzt" keen Afloss op d'Ermëttlungen huet)?
- 3) Gëtt et Statistiken, wéi vill Affer vu Kriminalitéit blesséiert gi sinn? Ginn et heizou och Statistiken, wéi een se an anere Länner fënnt zu Alter, Geschlecht, Nationalitéit vun den Affer? Wann net, ass den Här Minister gewëllt an Zukunft esou Statistiken ze erstellen?
- 4) Gëtt et Statistiken zum soziologesche Profil vum Täter wat Alter, Geschlecht, Nationalitéit ugeet, esou wéi et se och an anere Länner ginn, z.B. an all Detail an Däitschland? Wann net, ass den Här Minister gewëllt an Zukunft esou Statistiken ze erstellen?

Mat déiwem Respekt,



Fred Keup  
Deputéierten